

Namminersorlutik Oqartussat tamakkiisumik piginnittuullutik aktiaateqarluni ingerlatseqatigiiffiini ataasiakkaani siulersuisunut ilaasortassanik toqqaasarnermi nunatsinni najugaqavissut amerlanerussuteqartut ilaasortaasalernissaannik Naalakkersuisut aalajangersagaliortut inatsisissamik UPA2017-imi saqqummiussassamik siunnersuusoqqullugit peqquneqarnissaannik Inatsisartut aalajangiiffigisassaattut siunnersuut.

pillugu

Inuussutissarsiornermut Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Inuussutissarsiornermut Ataatsimiititaliap suliarinninnermini ilaasortarai:
Inatsisartunut ilaasortaq Siverth K Heilmann, Atassut, siulittaasoq
Inatsisartunut ilaasortaq Aqqaluaq B Egede, Inuit Ataqatigiit, siulittaasup tullia
Inatsisartunut ilaasortaq Justus Hansen, Demokraatit
Inatsisartunut ilaasortaq Suka K Frederiksen, Siumut
Inatsisartunut ilaasortaq Iddimangiiu Bianco, Inuit Ataqatigiit

1. Siunnersuutip imarisaa siunertaalu

Aktiaateqarluni ingerlatseqatigiiffinni Namminersorlutik Oqartussanit tamakkiisumik pigineqartuni siulersuisut katitigaanerut pillugu inatsisimmi maleruagassanik aalajangersaanissamut Naalakkersuisut peqquneqarnissaat siunnersuuteqartup matumani aalajangiiffigisassatut siunnersuuteqarnermi kissaatigaa, taamaalilluni ingerlatseqatigiiffinni ataasiakkaani siulersuisunut ilaasortat amerlanerussuteqartut Kalaallit Nunaanni aalajangersimasumik najugaqavissooqqullugit.

2. Siunnersuutip Inatsisartunit siullermeerpeqarnera

Siunnersuut siullermeerpeqarmat siunnersuut Inatsisartuni partiit il.il. tapersorsorneqartoq ilaannillu tapersorsorneqanngitsoq erserpoq. Tamatuma saniatigut siunnersuut Naalakkersuisunit tapersorsorneqanngilaq. Oqallinnermi isummat assigiinngitsorpassuit aktiaateqarluni ingerlatseqatigiiffinni siulersuisut katitigaanerannut pingaarutillit tikinneqarput. Tamatuma saniatigut ingerlatseqatigiiffiit ataasiakkaat siunertarisaannut niuernikkullu immikkut unammilligassaannut ikorfartuutaajuartussanngorlugit siulersuisut katitigaanissaannik pisariaqartitsineq, najukkami pissutsinik ilisimasaqarnissamik

pisariaqartitsineq aammalu nunatsinni najugallit siulersuisuni atorneqarnerunissaannik kissaateqarneq minnerunngitsumillu eqqumaffigisassat tamakku pissutsinik imminnut assortuuttunik nassataqarsinnaanerit aamma oqaluuserineqarput.

3. Ataatsimiititaliap siunnersuummik suliarinninera

Ataatsimiititaliamit aallarniutigalugu oqaatigineqassaaq aalajangiiffigisassatut siunnersuutip matumani pineqartup saqqummiunneqarnerani tunngavilersuutini pingaarnerni oqaatigineqarmat Namminersorlutik Oqartussat aktiaateqarluni ingerlatseqatigiiffini siulersuisunut ilaasortat nunaqavissut ikinnerunerat nalinginnaasuusoq. Akerlianik Naalackersuisut siullermeerinninnissamut akissuteqaamminni oqaatigaat ingerlatseqatigiiffinni siulersuisunut ilaasortat 60 %-iisa missaat nunaqavissuusut.

3.1 Siulersuisunut ilaasortat katitigaanerit

Tamanna tunngavigalugu aktiaateqarluni ingerlatseqatigiiffinni Namminersorlutik Oqartussanit pigineqartuni siulersuisut katitigaanerit pillugu paasissutissanik nutaanik (ilanngussaq 1) ataatsimiititaliaq nammeneq pissarsiniarsimavoq aammalu ingerlatseqatigiiffinni siulersuisunut ilaasortat ataatsimut isigalugu 60 %-ii ullumikkut Kalaallit Nunaanni najugaqavissuunerarlugit Naalackersuisut paasissutissiissutaat eqqortoq paasissutissat taakku uppernarsarpaat. Tassunga atatillugu Naalackersuisut piginnittuunertik aqqutigalugu siulersuisunut ilaasortat nunaqavissut amerlisinniarlugit anguniagaqarfiusumik aqqissuussaasumillu suliniuteqaqqullugit kaammattorneqarput. Najukkami pissutsinik inuiaqatigiinnillu ingerlatseqatigiiffiit Namminersorlutik Oqartussanit pigineqartut avatangiiserisaannik ilisimasaqarnissaq pingaaruteqartoq, tamannalu ingerlatseqatigiiffinni Namminersorlutik Oqartussanit pigineqartuni siulersuisunut ilaasortassanik toqqaasarnermi isiginiarniartariaqartoq ataatsimiititaliaq isumaqarpoq.

Paasissutissanit pissarsiarineqartunit takuneqarsinnaavoq Namminersorlutik Oqartussat aktiaateqarluni ingerlatseqatigiiffini siulersuisunut ilaasortat nunaqavissut amerlanerunerat nalinginnaasuusoq. Tassunga atatillugu sulisut siulersuisuni sinniisaat siulersuisunut ilaasortavittut soorunami naatsorsuunneqassammata oqaatigissallugu pingaaruteqarpoq. Sulisut sinniisaat ingerlatseqatigiiffimmi siulersuisuinut ilaasortat allat assinik pisinnaatitaaffeqarput, pisussaaffeqarput akisussaaffeqarlutillu. Aktiaateqarluni ingerlatseqatigiiffiit Namminersorlutik Oqartussanit pigineqartut sulisunik nunaqavissunik siulersuisut sulineranni peqataanissamut sapinngisamik annertunerpaamik kaammattuinnissamut piginnaaneqalersitsinissamullu kajumissarneqarnissaat Naalackersuisut piginnittuunertik aqqutigalugu sulissutigisariaqaraat ataatsimiititaliaq isumaqarpoq.

3.2 Ingerlatseqatigiiffiit Namminersorlutik Oqartussanit pigineqartut sooq aktiaateqarluni ingerlatseqatigiiffittut ingerlanneqassappat?

Tassunga atatillugu ingerlatseqatigiiffiit – suliffeqarfiit namminersortitat ingerlanneqarnerisa akerlianik - aktiaateqarluni ingerlatseqatigiiffittut ingerlanneqarnissaannik tunngavilersuutit qitiusut ilagaat naalackersuinnikkut toqqaannartumik akuleruffigineqanngitsumik ingerlatseqatigiiffiit niuerfinnut sammisumik ilisimasalinnit ingerlanneqarnissaasa qulakkeerneqarnissaa, tamatumani piumasaqaataavoq ingerlatseqatigiiffinni ataasiakkaani aqutsisut, tassa siulersuisut qullersallu niuernermut naapertuuttumik katiterneqarnissaat.

3.3 Siulersuisut katitigaanerisigut suliffeqarfiup pisariaqartitai ersersinneqartarput

Taamaalilluni aqutsisut qanoq piginnaaneqarnissaannik aktiaateqarluni ingerlatseqatigiiffiit Namminersorlutik Oqartussanit pigineqartut kissaatigisaat assigiinngitsorujussuupput. Taamaalilluni assersuutigalugu Royal Greenland A/S-ip nunarsuup immikkoortuini allani suliffeqarfimmik ingerlatsinissaq, avammut nioqquteqartarnermi niuerfinni niuernissaq nittarsaassinissarlu il.il. siunertaralugit immikkut ittumik piginnaanilinnik siulersuisuni ilaasortaataqarnissaq pisariaqartissinnaavaa, tamatumani niuerfiit immikkut ittut, tassungalu ilanngullugu assersuutigalugu Japanimi niuerfiit Royal Greenland A/S-ip tunisassianik qaffasissumik nalilinnik nioqquteqarfisartagai pillugit ilisimasalinnik siulersuisuni ilaasortaataqarnissaq pingaaruteqartorujussuusinnaalluni.

Akerlianik Illuut A/S allanik pisariaqartitaqarsinnaavoq, tassa ingerlatseqatigiiffik pigisanik aalaakkaasunik sanaartormik, pigisaqarnermik, tunisaqartarnermik attartortitsisarnermillu taamaallaat ingerlataqarmat.

Taamaalilluni piginnaasat aktiaateqarluni ingerlatseqatigiiffinni Namminersorlutik Oqartussanit pigineqartuni pisariaqartinneqartartut assigiinngitsorujussuusinnaapput, taamaattumillu ingerlatseqatigiiffiit ataatsimut isiginissaat mianersuuttariaqarluni.

Taamaalillunilu ingerlatseqatigiiffiit ilaanni tamaani najugaqartunik amerlasuunik siulersuisunut ilaasortaataqarnissaq naapertuuttarpoq, ingerlatseqatigiiffinnilu allani ingerlatseqatigiiffiup ineriartornissaa eqqarsaatigalugu immikkut ittumik piginnaanilinnik nunanit allaneersunik pissarsiniarnissaq pisariaqartinneqartarluni. Ingerlatseqatigiiffinni katitigaanerit assigiinngissuseqarnerat siuliani taaneqartoq naapertorlugu taama periuseqartoqareerpoq. Ingerlatseqatigiiffiit Namminersorlutik Oqartussanit pigineqartut siulersuisuini arlalinni najugaqavissut amerlanerussuteqarnerat ataatsimiititaliamit pitsaasutut isigineqarpoq. Ineriartormerli tamanna anguniagaqarfiusumik assigiinngitsunillu iliuseqarnikkut siunissami nukittorsarneqartariaqartoq ataatsimiititaliaq isumaqarpoq.

3.4 Siulersuisut katitigaanerat allanngorartuuvoq

Tamatuma saniatigut Inuussutissarsiornermut Ataatsimiititaliamit oqaatigineqassaaq ingerlatseqatigiiffinni siulersuisut katitigaanerat allanngorartuummat. Taamaalilluni ingerlatseqatigiiffik piffissami aalajangersimasumi assersuutigalugu suliffeqarfinnik kattussuussinermut imaluunniit niuernermit pissutsinut ammanerusunut naleqqussartarnermut piginnaasalinnik siulersuisunut ilaasortaqaarnissanik pisariaqartitsisinnaavoq piffissamilu allami sipaarutissat aningaasartuutillu immikkut aallutarinissaannik pisariaqartitsisinnaalluni. Taamaattumillu siulersuisut katitigaanerannik piginnaasaqarnerannillu suliffeqarfiup maannakorpiaq pisariaqartitaanut suliffeqarfiullu avatangiiserisaanik ineriartortitsinissamut ingerlaavartumik naleqqussaasarnissaq soorunami pisariaqartinneqartassaaq.

Tamanna Naalakkersuisut "Namminersorlutik oqartussanit pigineqartunik ingerlatseqatigiiffinnik aqutsilluarnissamut najoqqutassiaannut" naapertuuppoq, tamatumani kaammattuummi 5.1.1-imi oqaatigineqarluni ingerlatseqatigiiffiit siulersuisunik ukiumoortumik nalilersuisassasut. Ingerlatseqatigiiffiup unammilligassaanut naapertuuttumik siulersuisut katitigaanersut pillugu naliliinissamut siulersuisut aktiaatillillu naliliineq taanna aqqutigalugu periarfissinneqassapput.

Saqqummersitami tassani immikkoortoq 4.2-mi qulequttap "Assigiinngisitaartuuneq"-p ataani kaammattuutigineqarpoq ingerlatseqatigiiffinni aqutsisut tamatigoortumik pilersitserusussuseqarlunilu sapinngisamik aqutsinissamut assigiinngisitaartunik misilittagallit pigineqarnissaat. Siulersuisut suaassuseq, ilisimasat ilinniakkallu eqqarsaatigalugit assigiinngisitaartuunissaat Inuussutissarsiornermut Ataatsimiititaliamit tapersorsorneqarpoq. Aammattaaq ingerlatseqatigiiffiit ilisimasanik paasisimasanillu avataaneersunik pissarsiniarnissamut periarfissaat aalajangiiffigisassatut siunnersuummit matumangga mattunneqanngimmata erseqqissaatigissallugu ataatsimiititaliamit pingaartinneqarpoq. Taamaattumillu siulersuisuni assigiinngisitaartuuneq isumassarsioqatigiittarnerlu siunnersuutikkut matumani pineqartukkut sanngiillisinneqarnavianngitsoq ataatsimiititaliaq isumaqarpoq.

4. Eqqikkaaneq

Tassunga atatillugu ataatsimiititaliamit aamma eqqumaffigineqarpoq inunnik nunatsinni najugaqartunik annermik pissarsiortoqartassappat nunatsinni innuttaasut taama ikitsigitillugit inuup ataatsip atuuffiit arlallit tiggummileratarsinnaagai suliamut attuumassuteqartoqarneranik ajornartorsioritissutaalersinnaasumik. Tamanna aamma aningaasaqarnermut ministereqarfiup saqqummersitaani "Staten som Aktionær" allassimavoq, tassani oqaatigineqarluni ingerlatseqatigiiffinni siulersuisunik inuttalersuinermi nunanut allanut

qissimigaarnissaq naleqquttuussasoq, taamaaliornikkut suliamut attuumassuteqarnermik ajornartorsiutaasinnaasut aaqinneqarsinnaammata.

Isumaliutissiisummi matumani piffimmi allami oqaatigineqareersutut siulersuisut aqutsisullu assigiinngisitaarnissaat ingerlatseqatigiiffinnik pitsaasumik aqutsinissaq pillugu nassuiaammi kaammattuutigineqarpoq. Tassunga atatillugu illuatungeriinnut tamanut iluaqutaasinnaasumik siulersuisunut ilaasortat nunanit allaneersut ilisimasaminnik misilittakkaminnillu najukkami siulersuisunut ilaasortanut aamma avitseqateqarsinnaanerat isiginiangitsoorneqarsinnaangilaq.

Siulersuisunut ilaasortat amerlanerussuteqartut Kalaallit Nunaanni aalajangersimasumik najugaqarnissaat pillugu maleruagassanik atuutsitsisoqalissagaluarpat tamanna siulersuisunut ilaasortassanik kalaallinik piffissami aalajangersimasumi Kalaallit Nunaata avataani najugaqartariaqartunik toqqaanissamut Naalakkersuisut periarfissaannik siunissami killiliisinnaavoq. Aalajangiiffigisassatut siunnersuut una naalackersuinikkut amerlanerussuteqartunit akuersissutigineqassappat tamatuma ingerlatseqatigiiffinnut pineqartunut ungasinnerusumi kingunerisinnaasai ataatsimiititaliamit maannangaaq oqaatigineqarsinnaangillat.

5. Siunnersuutip aningaasaqarnikkut kingunerisassai

Aalajangiiffigisassatut siunnersuummut matumunnga atatillugu inatsisissatut siunnersuummik suliarinninnermi Namminersorlutik Oqartussat aningaasartuutissat siunnersuuteqartumit eqqorluinnartumik oqaatigineqarput. Aalajangiiffigisassatut siunnersuutip matuma piviusunngortinnera aktiaateqarluni ingerlatseqatigiiffinnut nunanut allanut nioqquteqartartunut aammalu siulersuisunut ilaasortassanik avataaneersunik nunani tamalaani pissutsinik ilisimasaqarnerat pissutigalugu atuinissamik pisariaqartitsisunut sunniuteqarsinnaasutut isigineqartariaqarpoq.

Ataatsimiititaliap inassuteqaatai

Ataatsimiititaliami amerlanerussuteqartut Siumut, Inuit Ataqtigiit Atassutillu ilaasortaataasa siunnersuut akuerineqassasoq inassutigaat.

Ataatsimiititaliami ikinnerussuteqartup Demokraatit ilaasortaataata matuma kinguliani allassimasunik oqaaseqaateqarluni siunnersuut itigartinneqassasoq inassutigaa.

Manna siunnersuut aqputigalugu amerlanerussuteqartut aalajangerniarpaat ingerlatseqatigiiffinni siulersuisunut ilaasortat qassit Kalaallit Nunaanni najugaqassanersut. Demokraatini siunnersuut isumaqatiginngilarput. Tamatumunnga pissutaavoq isumaqaratta, ilinniarsimasat piginnaanerillu aalajangiisuusariaqartut kikkut sullivimmi siulersuisunut ilaasortaanissaannut. Ilinniarluarsimasut piginnaaneqarluartullu siulersuisuni ilaasortanngortissinnaagaanni - taava sulliviup iluatsitsilluarnissaa qaninnerussaaq. Sulliviit ingerlalluartut inuiaqatigiinnut tamanut iluaqutaapput.

Siunnersuut pissutaalluni Namminersorlutik Oqartussat piginnaaneqarnerpaanik siulersuisunngortitsinissaminnut periarfissaat mangiarneqassapput. Taamaattumik siunnersuut toqqaannartumik inuiaqatigiinnut inuiaqatigiillu aningaasarsiornerannut innarliisinnaavoq.

28. maj 2016


UPA2016/133

Taama oqaaseqarluni isumaliutissiisumilu allassimasutut paasinnilluni ataatsimiititaliap siunnersuut aappasaaniigassanngortippaa.



Siverth K Heilmann

Siulittaasoq



Aqqaluaq B Egede

Siulittaasup tullia



Justus Hansen



Suka K Frederiksen



Iddimangiu Bianco

Inkl. medarbejdervalgte bestyrelsesmedlemmer

	KAL	DK	DE	NO	UK	FI	SE	IS	Antal Ialt	KAL i procent
RG	4	1	1	1	2				9	44%
RAL	4	3		1					8	50%
AG	4	1							5	80%
KNI	5	3				1			9	56%
TELE	4	2							6	67%
GG	2	2							4	50%
GH	3	1							4	75%
VISIT	6								6	100%
ILLUUT	3								3	100%
INI	3	2		1					6	50%
NUNA	2	1			1				4	50%
GOSR	1	1		1					3	33%
SIKUKI	2	1					1	1	5	40%
Samlet antal	43	18	1	4	3	1	1	1	72	

Samlet
 antal **59,72%** **25,00%** **1,39%** **5,56%** **4,17%** **1,39%** **1,39%** **1,39%**
 i procent

